

大乘阿毗達磨雜集論述記卷第十四

唐京兆大慈恩寺沙門窺基撰

云何見所斷幾是見所斷爲何義故觀見所斷耶。謂分別所起染汙見疑見處疑處及於見等所起邪行煩惱隨煩惱及見等所發身語意業并一切惡趣等蘊界處是見所斷義。此中分別所起染汙見疑者謂聞不正法等爲先所起五見等分別所起言爲簡俱生薩迦耶見及邊執見問何相邊執見是俱生耶。答謂斷見已學現觀者起如是怖今者我我爲何所在見處者謂諸見相應其有法及彼種子疑處亦爾於

見等所起邪行煩惱隨煩惱者謂依見等門及緣見等所起貪等。

依見緣見者依見謂為同類因等生。

一切一分是見所斷。一分者除修所斷及無漏故為捨執著見圓滿我故觀察見所斷。

見圓滿我者先云見謂見道圓滿謂所斷具攝十

八界等故名圓滿彼皆計見所斷為圓滿我故。今

解執我能見本理圓滿今其要無漏見斷見所斷

方見圓滿非我也。

云何修所斷幾是修所斷為何義故觀修所斷耶。謂

得見道後見所斷相違諸有漏法是修所斷義見所

斷相違者謂除分別所起染汙見等餘有漏法有漏

法言亦攝隨順決擇分善麤重所隨故。一切一分是

修所斷。一分者除見所斷及無漏法為捨執著修圓

滿我故觀察修所斷云何非所斷幾是非所斷為何

義故觀非所斷耶。謂諸無漏法除決擇分善是非所

斷無漏法者謂出世聖道及後所得并無為法十界

四處諸蘊一分是非所斷。問何等色聲是非所斷。答

無學身中善身語業自性是非所斷為捨執著成滿

我故觀察非所斷。

見斷等義略以四門分別。一出所斷體。二辨所斷
 義。三顯所斷位。四問答分別。所斷體者謂有漏法。
 通色非色所有業果。非色有七位。一心。二徧行。三
 別境。四善。五根本煩惱。六隨煩惱。七不定。其諸假
 法見修所斷如實法說。於非色中初之三位隨與
 此相應。即說此所斷及非所斷根本煩惱中三見
 及疑唯見所斷分別起故。於邊見中有義常見唯
 見所斷對法第四瑜伽八十八唯說斷見修所斷
 故有義亦通修所斷顯揚一大論八說常見斷見
 皆通分別及俱生故。餘貪等五通見修斷依見緣

見緣事生故。隨煩惱中無慚等十通見修斷能通
 不善染汙心故。忿等前十有義唯修斷唯緣事生
 不迷理故有義皆通見修所斷五十八說嫉無漏
 故對法第三亦云嗔恚嫉出離故諸外道等緣見
 依見亦有能生忿慳等故睡眠尋伺通見修斷惡
 作有義唯修所斷緣事生故有義亦通見道所斷
 亦依見等悔善等故其餘諸法唯修所斷及非所
 斷五十七說信等五根通修所斷及不斷故六十
 六說善及無記修所斷故。此如唯識第六第七卷
 說善等有義亦見所斷對法第四說惡趣一切蘊

界處等見所斷故唯識論第八卷說若緣縛斷說
 善等法唯修所斷依不生斷無想定等說見所斷
 由此傳釋諸三惡趣別報善法此業及果是見所
 斷前染汙法所發諸業及所得果若色若心見所
 斷發所得果者此見所斷修所斷發及所得果皆
 修所斷如對法第四等說諸非所斷略有二例一
 非縛謂諸無漏有為無為對法第四說唯諸無漏
 非所斷攝二已畢竟斷名非所斷六十六說無學
 身中善無記法名非所斷此總第一出所斷體二
 辨所斷義者略有二位一自性斷謂諸染法通見

修斷二離縛斷此有二種一離縛斷謂斷緣彼雜
 彼煩惱六十六說善無記法唯修所斷二不生斷
 此有二種一因滅果不生謂三惡趣果見道所斷
 二果衰因不生謂諸善法見道所斷五十三說於
 見道中無想異熟能得畢竟非擇滅性故因亦斷
 如是類也諸非所斷二類如前出體中說此即第
 二辨所斷義如唯識緣生中釋其惡趣果斷二種
 一云體亦隨無見道障故論云無記修所斷者據
 餘無記雜緣縛說一云唯斷業有無記不除不能
 生異熟云何釋異熟障據此果無記體在生雜緣

總三顯所斷位者見斷修斷有義因果俱一刹那
 無閒道生一時頓斷如圓鏡智無閒道生此師意
 說一心見道無閒道生此時頓斷諸業煩惱及果
 若三心見道二無閒道時亦因果俱斷解脫道時
 唯能證理有義惑業無閒道生即便已斷其所感
 果無閒道俱解脫道生其果方斷如圓鏡智解脫
 道生若於修道不斷果位二障種子無閒道斷二
 障麤重無閒俱解脫道生麤重方斷是為無閒解
 脫差別如唯識第九第十說四問答分別問能斷
 所斷同時異時答非同非異猶如明闇及稱兩頭

高時下時平等平等問為斷現在為過未耶答非
 斷三世仍從三世而說於斷未來未生故過去已
 謝現在不住故然如明闇斷彼惑時三世不轉說
 斷三世此上諸門如五十九及論說頗有斷彼種
 子不斷麤重耶應作四句有先斷種子不斷麤重
 謂二乘者斷煩惱種不斷彼麤重不得名為永斷
 習氣如五十九說有斷彼麤重不斷種子謂十地
 菩薩斷彼俱生煩惱麤重不斷彼種有亦斷麤重
 如見道究竟道斷二障種子及與麤重十地菩薩
 所知障種及與麤重俱時頓斷此上二句如解深

密第七十八唯識第九卷說有不斷種子亦非麤
 重謂世閒道唯伏現行不能永斷種麤重故處處
 經論并有此文頗有先斷煩惱障不斷所知障耶
 應作四句第一句謂二乘者第二句十地菩薩第
 三句見道究竟道二種菩薩第四句謂異生頗有
 生在下地斷上煩惱耶應作四句第一句者謂生
 下地斷上地煩惱得諸聖果第二句謂生上地得
 無學斷下未那俱生惑故第三句者如理應知第
 四句謂異生隨生上下唯伏現行不斷種故如唯
 識二障中說見斷等中楞伽有一身見十地經論

第四地身見為首大智度論第五十二云七地菩薩
 轉煩惱者菩薩以福德持戒力故折伏麤煩惱安
 穩行道唯有愛見慢等微細者今亦離細煩惱此
 論言七地離見是何見耶

云何緣生幾是緣生為何義故觀緣生耶謂相故分
 別支故略攝支故建立支緣故建立支業故支雜染
 攝故義故甚深故差別故順逆故是緣生義

緣者謂以為境三種緣生謂自性愛非愛受用三
 種四緣生謂相續刹那連縛分段諸內情法無始
 不斷名相續一刹那中具十二癡為無明思為行

心爲識餘爲名色六根爲六處觸數爲觸受數爲
 受貪爲愛餘惑爲取卽無慚等身語業爲有諸法
 起用名生異相名老無常爲死內外情非情有無
 漏法前滅後生相連縛故名連縛此體通有無漏
 十二緣起三世異故名分段勘攝論

相者謂無作緣生故無常緣生故勢用緣生故是緣
 生相由此相故薄伽梵說此有故彼有此生故彼生
 謂無明緣行乃至廣說此有故彼有者顯無作緣生
 義唯由有緣故果法得有非緣有實作用能生果法
 此生故彼生者顯無常緣生義非無生法爲因故少

所生法而得成立無明緣行等者顯勢用緣生義雖
 復諸法無作無常然不隨一法爲緣故一切果生所
 以者何以諸法功能差別故如從無明力故諸行得
 生乃至生力故得有老死

一切外道執諸法有實作用有實能生用是相者
 中有三故第一破吠世師立諸法有實作用卽有
 作用句是第二句破外道大自在天體實徧常能
 生諸法餘亦復如是非佛爲遮當來大眾部等故
 作此說大眾部化地部等立緣生是常第三句破
 一因生論卽外道執一大自在天有此三義一者

有實能生作用。二者因常三者一因生一切物。然緣起經亦有此三相。

分別支者謂分別緣生爲十二分由十二支緣起差別故。何等十二謂無明行識名色六處觸受愛取有生及老死。略攝支者謂前所分別無明等十二支今復略攝爲四謂能引支所引支能生支所生支。

十地論亦有能引所引與瑜伽緣起經不同。如唯識論。

唯由如是四種支故略攝一切因果生起法盡謂於因時有能引所引於果時有能生所生。

謂於因時有能引所引於果時有能所生者愛取有是因非果以近能生生老死故。因從近果亦名爲果。十地經云愛取有生老死是見未來世事故。又解果者熟義謂彼前業等種今爲愛等所潤將熟得果故約正熟皆名爲果。

能引支者謂無明行識爲起未來生故於諸諦境無智爲先造諸行業熏習在心故。

於諸諦境無智爲先者顯四諦下不共無明皆能發業雖無明行相唯有一謂異熟真實義然迷四諦總別皆得。

所引支者謂名色六處觸受。由心習氣力能令當來名色等前後相依次第生起種子得增長故。能生支者謂愛取有。由未永斷欲等愛力於欲等中愛樂妙行惡行差別為先發起貪欲。

未永斷欲等愛力即因力。謂於欲見戒我語四之愛起四境界。於欲等中即境界力。愛樂等者即作意力。此釋愛支。

以有有取識故於命終位將與異熟隨順貪欲隨一業習氣現前有故。

以有有取識者彼云以有者謂生支等後有第二

有字謂有支業取識者明取支相應識明取支相能潤業支有取於後有生支等報故。故下文云取有二業一為取後有令諸有情發有取識。此釋取支隨順貪欲下解有支今解以有者有無之有也。第二有者當果有也。取識者謂業行種此論說為識支以有彼取當有之業識故於命終位將與異熟等也。次言取支相應識有何意也。或初有有無之有。次有謂有支。此能取當來識支故名有取識。發起貪欲即通愛取二故。故云隨順貪欲不爾應言隨順於取何故。乃言隨順貪也。

所生支者謂生老死。由如是業差別習氣現前有故隨於一趣一生等差別眾同分中如先所引名色等異熟生起故。生老死言為顯依三有為相故。

顯依三有為相者以三相名顯。此下支以欲顯依三相緣起經中顯三苦故。離老病死等如唯識解。所以老死合立一支者為顯離老得有死故非於胎生身中離名色等得有六處等法是故於彼各別立支。

非於胎生身中等者。化生頓起應六處俱。然可後別。胎生必不爾。故徧簡之。其溼生卵生亦復如是。

建立支緣者謂習氣故引發故思惟故俱有故。建立支緣隨其所應依四緣相建立支緣。且如無明望行前生習氣故得為因緣。由彼熏習相續所生諸業能造後有故。當於爾時現行無明能引發故為等無閒緣。由彼引發差別諸行流轉相續生故。思惟彼故為所緣。緣以計最勝等不如理思惟緣愚癡位為境界。故彼俱有故為增上緣。由彼增上力令相應思顛倒緣境而造作故。如是一切隨其所應盡當知。建立支業者謂無明支有二種業。一令諸有情於有愚癡二與行作緣。令諸有情於有愚癡者謂由彼所覆於前。

中後際不如實知故由此因緣起如是疑我於過去世為有為無如是等。

業中十地論者應一一配乃至引婆沙瑜伽一一

支中釋妨難無明業中起如是疑我於過去為有

為無卽十九無明如瑜伽第九謂前際後際前後

際內外內外業異熟業異熟佛法僧四諦因及所

生行并於六觸處如是無知其前際中有四謂我

於過去若曾有為非有耶曾何體性曾何種類今

舉有無等餘二前十八無知。

與行作緣者由彼勢力令後有業得增長故。

緣起經內法異生不放逸者所有福及不動行非

無明為緣瑜伽說無明通發三業有三會二云內

法異生不放逸者卽解脫決擇不感總報非四見

道無明所發唯修道無明發唯感別報故四無明

唯見故二解緣起經以有覆無記信所攝伏發非

不善四無明發據實有覆發亦感總報三云有不

善位識在唯無不共相應二種非無種子多分位

無支發為別餘異生所以不說非無隨眠發總報

行有二種業一令諸有情於諸趣中種種差別二與

識作緣令諸有情於趣差別者由業勢力令諸有情

趣種種異趣故與識作緣者由習氣力能使當來名
 色等生起種子得增長故識有二種業一持諸有情
 所有業縛二與名色作緣持諸有情業縛者與行所
 引習氣俱生滅故與名色作緣者由識入母胎名色
 得增長故名色有二種業一攝諸有情自體二與六
 處作緣攝有情自體者由彼生已得預有情眾同分
 差別數故與六處為緣者由名色等前支為依止六
 處等後支得生起故

名色二業攝有情自體即為入母胎於識之業復
 說識入母胎何故說二俱入母胎今有二解一識

支據實入母胎言名色入胎者前說識為業種故
 又解識支一七日未有形量相貌未為有情自體
 一七日後有相故名有情體非為入胎不相違也
 又識依現在現行識能持業習氣故即是過去業
 所感識說名色依是由業入母胎說唯識云依現
 在說識等五當來說生老死

六處有二種業一攝諸有情自體圓滿二與觸作緣
 攝諸有情體圓滿者由彼生已餘根無缺故觸有二
 種業一令諸有情於所受用境界流轉二與受作緣
 令有情於境流轉者依此為門受用順樂受等三種

境界故受有二種業。一令諸有情於所受用生果流轉。二與愛作緣。令有情於受用生果流轉者。由此為依受用種種可愛等業異熟故與愛為緣者。希求與此和合等為門。諸愛生故。愛有二種業。一引諸有情流轉生死。二與取作緣。引諸有情流轉生死者。由彼勢力生死流轉無斷絕故與取作緣者。愛味求欲為門於欲等中貪欲轉故。取有二種業。一為取後有。令諸有情發有取識。二與有作緣。為取後有發有取識者。為那落迦趣等差別。後有相續不斷。令業習氣得決定故。與有作緣者。由此勢力諸行習氣得轉變故。

發有取識者。彼云發於有支。取識謂取支同時識。明地獄等五趣差別。令後有不斷。釋上為取後有。令有支業習氣得決定。果釋上發有取識。亦可取識者。由取支發有業。令未來識支得現前。故名取識。由此取支潤業力。故諸行支習氣既為取潤。轉成有支。故言轉變。或取者漏義。即有漏業。業即識故。發有漏之業。此同上解。

有有二種業。一令諸有情後有現前。二與生作緣。令後有現前者。能引無閒餘趣故。與生作緣者。由此勢力餘眾同分轉故。生有二種業。一令諸有情名色六

處觸受次第生起。一與老死作緣。令名色等次第起者。能引後後位差別故。與老死作緣者。由有此生彼相續變壞皆得有故。老死有二種業。一數令有情時分變異壞少盛故。二數令有情壽命變異壞壽命故。支雜染攝者。若無明若愛若取是煩惱雜染所攝。若行若識若有是業雜染所攝。餘是生雜染所攝。問。何故識支業雜染攝耶。答。諸行習氣所顯故。

三雜染如唯識解。瑜伽九云。三煩惱。一是業。餘是苦作業。有說攝大乘等唯說三煩惱。唯識說行有一分業也。七有一分苦。今準此三文不同。以識業

通二故。

義者謂無作者義。有因義。離有情義。依他起義。無作用義。無常義。有剎那義。因果相續不斷義。因果相似攝受義。因果差別義。因果決定義。是緣起義。謂離自在天等作者故。是無作者義。以無明等為因故。是有因義。無自然我故。是離有情義。託眾緣生故。是依他起義。眾緣作用空故。是無作用義。以非恆故。是無常義。生時過已無暫住故。是有剎那義。因剎那滅果剎那生時分等故。是因果相續不斷義。不從一切一切生故。是因果相似攝受義。從非一一類因非一一類

果生故，是因果差別義。於餘相續不受果故，是因果決定義。

義中有十一門。依提婆菩薩破外道論。此中第一是韋陀論師六師論中迦羅鳩馱外道計。彼立梵天能出生一切。與一切法為因。梵天為作者。論文解於彼云。大自在天等緣。故知一切皆立不平等。因皆在此中。第二破尼乾子。不須修因。見謂八萬劫自然解脫。第三破自然我那邪修摩計。彼立我為諸法因。第四破阿耨多見。彼諸法不從因得。自然。然而有不從緣生。第五破勝論師。立我外別有作

用句。立諸法有實作用。何句此是第六破僧佉計。冥性是常。能與二十三諦為因。第七破正量部。因果剎那長短。第八破上座。生滅同世。或經部。明異熟因果不同世。仍無去來。義釋。果時無因。因時無果。難唯識第三卷第九釋。外道等四大生一切物。故云一切諸法互相生。難顯功能決定相似相生。故第十釋。小乘等一因一身果等難。今顯多因於一身。一類果生。如五無間果。一身受。一因於多身。多類果生。如生報等。多身受。從初為名。名生報業。一因生一果。多因業於多身之類。果生成四句義。準

此釋文。即便易解。第十一釋。既爾不定業。應名何報等難。顯定生唯生定後。唯後若不定者。可有轉義。初六破外道。次二破小乘。後三釋妨難。雖非無因作用等。非從一切。一切果生。非從一因。唯一果生於餘相續。亦不得受果論。是故如是說。即瑜伽第十說。

義中十一門。初一破不平等因。第二破無因論。第三破我即蘊相。第四第五顯有功能緣無作用緣。第六第七顯體無常非常住不同僧佉等。此二破常見。第八破斷見。因果不斷故。第九破因果互通。

生第十破。諸一因唯一身受果計。第十一釋。此一因多身受果妨難。準下甚深。初復次解。此為五段。準下甚深中。第二緣次難。四是。此中五義破他餘類。此中第七第五第三第一。如下次配下四總顯有因。即遮第二無因故。合為五餘之五門對破。他以顯自宗。通明緣起八門。分為二。初六明染法。後二明淨法。前六門又分三。初二唯內別總法。次二唯外別總報。後二內外。二緣法。唯內別法。愛非愛內外通法故。瑜伽云。十二支攝識生愛非愛。二各一分攝。內死生全餘不相攝。其清淨順無漏。故不

說。

甚深者。因甚深故。相甚深故。生甚深故。住甚深故。轉甚深故。是甚深義。謂卽由此無作者等義。顯緣起法五種甚深。由二種義顯。因甚深對治不平等。因無因論故。由一種義顯。相甚深。是無我相故。由二種義顯。生甚深。雖從眾緣果法得生。然非彼所作故。由二種義顯。住甚深。實無安立。顯現似住故。由四種義顯。轉甚深。因果流轉難了知故。又諸緣起法。雖刹那滅而住可得。雖無作用緣而有功能緣可得。雖離有情而有情可得。雖無作者而諸業果不壞可得。是故甚深。

業果不壞者。雖內無作者而有作業受果異熟。又諸緣起法。不從自生。不從他生。不從共生。非不自作他作。因生是故甚深。不從自生者。謂一切法非自所作。彼未生時無自性故。不從他生者。謂彼諸緣非作者。故不從共生者。謂卽由此二種因故。非不自作他作。因生者。緣望果生有功能故。又有差別。謂待眾緣生。故非自作。雖有眾緣無種子不生。故非他作。彼俱無作用故。非其作。種子及眾緣皆有功能。故非無因生。是故如是說。自種有故。不從他待眾緣。故非自作。無作用故。非共生有功能。故非無因。若緣起理。非自非

他遣雙句者猶為甚深況總亡四句是故緣起最極甚深。

甚深中十地論有二二三四句與此第三復次同。差別者謂識生差別故內死生差別故外穀生差別故成壤差別故食持差別故愛非愛趣分別差別故清淨差別故威德差別故是差別義識生差別者謂眼色為緣眼識得生如是等。內死生差別者依有情世閒說謂無明等為緣能生行等。外穀生差別者謂種緣芽芽緣莖如是展轉枝葉華果次第得生成壤差別者謂一切有情共業增上力為緣大地等生故。

食持差別者謂四食為緣三界有情相續住故愛非愛趣分別差別者謂妙行惡行為緣往善惡趣故清淨差別者謂順解脫分善為緣生順決擇分善如是見道等漸次乃至得阿羅漢果等或外從他聞音內如理作意為緣發生正見次第乃至諸漏永盡威德差別者謂內證為緣發神通等最勝功德。由此差別應隨廣說諸行緣起。

差別八門如大論第十有漏三性等義可知。彼以十二支攝二一分一全分。

順逆者謂雜染順逆故清淨順逆故。是說緣起順逆。

雜染順逆者或依流轉次第說謂無明緣行如是等
 順次第說或依安立諦說謂老死苦老死集老死滅
 老死趣滅行如是等逆次第說清淨順逆者謂無明
 滅故行滅如是等順次第說由誰無故老死無由誰
 滅故老死滅如是等逆次第說應如是觀緣生起義
 一切皆是緣生唯除法界法處一分諸無為法為捨
 執著無因不平等因我故觀察緣生。

順逆中如大論第十三復次釋涅槃經說逆除無
 明行識觀餘九識業故非未來集因故不說觀或
 逆觀十菩薩為太子時觀生老病死乃至識支不

觀餘二如九十三說或觀十一如四十四智等中
 說以無因故涅槃經說為生婆羅門除生一法說
 十一支應彼機故

雜染順者瑜伽第十有三復次釋九十四中亦說
 三世順次雜染逆者此中依四諦理說九十二中
 說世尊在昔菩薩時棄前所得諸世俗智及棄世
 諸師處菩提座為欲悲愍利樂有情以為上首自
 於諸諦起正觀察爾時為欲歷觀苦諦由老死支
 苦諦所攝故於緣起逆歷觀察有三種相等乃至
 廣說異常大精唯說至愛取二諦周已復觀集諦

乃至識二諦已及善方便觀滅諦道諦觀道諦至
 無明欲令盡無故此為世閒見故安立諦是雜染
 攝清淨順者此依現法從他聞音斷緣起支次第
 如九十三初染次第生起已次云若於現法中從
 他聞音乃至能於二種果性乃至發生正見道勝
 前染逆觀已又於諸諦漸次獲法乃至無學清淨
 知見斷無明等是清淨順次。逆次第者依斷滅已
 重觀而說。此中染順是生死法。染逆是斷生死法。
 方便清淨是正斷清淨逆是重觀已斷。九十三大
 好應取彼文。

云何緣幾是緣為何義故觀緣耶謂因故等無閒故
 所緣故增上故是緣義。一切是緣為捨執著我為因
 法故觀察緣。

四緣應為十據立親疎前後俱時俱緣不緣者。

因緣者謂阿賴耶識及善習氣與有漏無漏諸法如
 其次第為因緣故。阿賴耶識復有二種謂成熟及加
 行成熟者是諸生得法因緣。加行者是諸方便法及
 當來世餘阿賴耶識因緣。又加行阿賴耶識者謂於
 此生中現行轉識等之所熏集善習氣者謂順解脫
 分習氣由此習氣用出世閒證等流法為緣生故能

與出世法作因緣。

善習氣等中有三宗釋。三宗護月釋真如為所緣
從果為名。今解即見道前聞緣彼法為增上緣。勢
力增長本有種子後生。出世故言由彼所緣生非
從果也。

又自性故差別故助伴故等行故增益故障礙故攝
受故是因緣。相當知此中以自性等六種因相顯因
緣義。謂自性差別兩句建立能作因。餘句如其次第
建立俱有相應同類徧行異熟因。

唯識云設名因緣應知假說。此乍同小乘能作因

生等五因是因緣故。下文當知一切因皆能作因
差別。即似小乘故。大乘中假說因緣義。涅槃經明
二因。一。生因。二。了因。生因攝四緣。或三緣。業煩惱
為生因。如有望生老死。現異熟因。云何有等無閒
緣。二。了因。唯增上緣。望佛法及涅槃。為了因。故應
更勘經菩薩地說。二因能生方便。成實論說三因。
謂生因。依因。習因。生因是報因。依是共有因。習是
自分因。大乘是增上緣。或習是因緣。現行望種子
為習故。此既從勝義。應不爾。彼宗不說種子。故涅
槃經。瑜伽此論五因。謂生因。依因。建立因。持因。養

因并增上緣有六因能作因等十因等果。如唯識解。

自性者謂能作因自性依因自性建立能作因故。當知一切因皆能作因所攝。為顯差別義故。復別建立助伴等因。差別者謂能作因差別略有二十種。一。生能作。謂識和合望識。由此和合所作本無今有故。二。住能作。謂食望已生及未生有情。由此勢力生已相續不斷故。三。持能作。謂大地望有情載令不墮故。四。照能作。謂燈望諸色了闇障故。五。變壞能作。謂火望薪令彼相續變異故。六。分離能作。謂鎌望所斷令連

屬物成二分故。七。轉變能作。謂工巧智等望金銀等物。轉彼方分成異相故。八。信解能作。謂煙望火。由此比知不現見故。九。顯了能作。謂宗因喻望所成義。由此得正決定故。十。等至能作。謂聖道望涅槃。由此證破故。

此中能作因攝一切法。若親若疎。現行及種。望果不障。或能助力。皆能作因。解自性中云。當知一切因皆能作因所攝。又云。差別者謂能作因差別略有二十種。遂說十位。謂善菩提。攝受有慧。無亂障。迴向不怖。慳自在。名善等。及十因故。初言七故。六

因俱因緣義唯識第七會云唯依此二建立因緣
所餘因緣不可得故。

二十能作中初十能作有辨中邊第一卷障品文。
大精應勘之善普提攝受有慧無亂障迴向不怖
慳自在名善等。

十一隨說能作。謂名想見。由如名字取相執著隨起
說故。

隨說因此及諸論不同。如唯識會然彼云謂見聞
覺知。此中且但有見略也。以瑜伽第五有聞見等
後起言說故。此義不然若爾見應非執著。此初通

說三性因體。

十二觀待能作。謂觀待此故於彼求欲生。如待飢渴
追求飲食。由此是彼欲生因故。十三招引能作。謂縣
遠緣。如無明望老死。由此異位展轉招當有故。十四
生起能作。謂鄰近緣。如無明望行。由此無閒生當有
故。十五攝受能作。謂所餘緣。如田水糞等望穀生等。
雖自種所生然增彼力故。十六引發能作。謂隨順緣
如臣事王令正悅豫。由隨順引發故。十七定別能作。
謂差別緣。如五趣緣望五趣果。由差別自性招別別
果故。十八同事能作。謂和合緣。如根不壞境界現前

作意正起望所生識以成自所作必待餘能作故。十
 九相違能作謂障礙緣。如雹望穀能損彼故。二十不
 相違能作謂無障礙。如穀無障與上相違於此能作
 因差別中唯說識和合等者。且舉綱要為諸智者依
 此一方類思餘故。

觀待此唯無記招引生起唯染生起與唯識等別。
 此謂鄰近說生近果名生因攝受引發此唯無記。
 定別唯染同事相違不相違唯無記皆略舉一準
 餘可知性故謂能作因言自性差別顯餘因皆能
 作差別立二十種別差別為是後五。

助伴者謂諸法共有而生必無缺減如四大種及所
 造色隨其所應非一切聚定有四大及色等所造若
 於是處有爾所量此必俱生互不相離。

俱有因云助伴顯非同一果及互為果唯助伴故。
 俱有因彼云二門分別。一成立義依俱舍必具四
 義。一生住滅二世一果一性即十隨轉然彼師不
 解極依分別然應思準。二約法分齊小乘可知今
 大乘一切皆有為法共有而生即是此因體性寬
 於小乘然眾多種子生一現即同得一果立俱有
 因若種子等所有現行法為因名俱有因非同一

果義

俱有因論云謂諸法共有而生必無缺減卽一切
 俱有法相依俱起有力者皆是此因如四大種及
 所造色隨其所應釋論仍云非一切聚定有四大
 及色等所造若於是處有爾所量必俱生互不相
 離爲因非餘故下相應因中云此但略舉綱要卽
 四大望造色相依俱有故亦是此因無性攝論第
 二云若說五因爲因緣者卽異門說阿賴耶識俱
 有因義說阿賴耶識與諸轉識此文卽顯本轉二
 識互爲俱有因以在因中互爲因緣故及俱有依

止故故無性云若離如是俱有因攝內外種子阿
 賴耶識所餘因緣定不可得此中總說本識七識
 互爲此因卽因緣俱有因今以義詳然有差別若
 在果位七以八爲因八不以七爲因非能熏故若
 非因緣者唯以七爲俱有依故若在因位前之七
 識皆以八爲因八以七識爲因除六識中異熟果
 者非能熏故前六以七爲因七不以六爲因不依
 六現故五識以六爲因不以五爲因前之五識互
 不以爲因於一一識聚中相應心心所更互爲因
 其所緣相有二說二云八識相緣本識相分隨所

與七識爲因非七爲八因。七相非六因六相非七
 因六相非五因五相非六因五相相望亦爾。其本
 識中心王相分與心所相分爲因非心所相分與
 王相分爲因。不仗託故。餘之七識心王心所相分
 雖復俱有而互爲因。相仗生故。有義諸相分雖由
 餘故有餘非俱有因俱有因者相親依而俱有者
 仗。諸相分相望皆非種故與見分既非親合非俱
 有因。見自證等其現亦非非異體故於相分中大
 種與造色爲因造色與大種同聚者爲因必無闕
 減互不相離說爲因故。大種望大種造色望造色

隨所應有皆得爲因。不同餘宗不闕十隨轉及更
 爲果立俱有因故其種子如異性異熟因種名言
 種子爲因名言與業種非因大種與造色爲因非
 造色與大種爲因不託生故。眼種與眼識種爲因
 非種識與眼爲因。餘相仗者皆如是若託爲因唯
 同地因若俱者通他地。此中依因緣爲俱有因。唯
 本識等增上緣。如此中次相應因中唯心心所同
 行一境爲因此論依現行相望爲論。無性云相應
 因者心與心所更互相待。受用境界有自功能。猶
 如商旅非離功能阿賴耶識能依種起卽與相應

法為因是因緣種。此通因緣非因緣同類。因界唯
 自界。色唯色蘊。四唯四蘊。善不善無覆。唯自性。其
 有覆。身邊見等。亦與不善煩惱為因。由習增故。其
 不善煩惱不現增。俱生身邊見故。非因。或與等非
 因。不增勝故。異性非因。不相似故。

等行者。謂諸法共有等行。所緣必無缺減。如心心所
 前約助伴決定建立。俱有因中。唯說大種及所造色
 者。此但略標綱目。以心心所互不相離性決定故。亦
 助伴攝。若爾不應別立相應因。諸心心所亦共有因
 所攝故。雖爾然義有異。謂諸法共有等行。所緣互不

相離。此等行故。立相應因。非唯共有義。如心心所。

相應因者。顯非辨體。但行同境。亦顯種因。更皆為
 因。

六釋釋名。相應因。等行所緣名。等行中。同一所緣
 不同行。相等應。如唯識二解本質影像。然唯現行
 為因。乃至增上緣。若種子與相應心等法。為因名
 因緣。

增益者。謂前際修習善不善無記法。故能令後際善
 等諸法展轉增勝。後後生起。前際修習者。謂先所數
 習現行義。後際展轉增勝。後後生起者。謂由彼長養

諸種子故於未來世即彼種類增勝而生如是諸法
能為相似增長因故立同類因。

同類因言增益者顯與等勝為因非劣故。

同類因五蘊互相望皆得謂無表色等。或準小乘
善不善五蘊皆得無記五蘊。一總二別總中如俱
舍等有四說然準迦延四大於心心法所緣緣增
上不言有因故第四說色非四因好或解色不為
四因四為色因第二師好乃至十時皆如理知。四
無記相望應知。然準此文唯與勝為因不與等劣
為因唯言增勝故。或唯同小乘與等為因論言能

為相似因故。若現行相望皆增上緣。若種望種自
類望現行自類皆因緣。

障礙者謂隨所數習諸煩惱故隨所有惑皆得相續
增長堅固乃令相續遠避涅槃。此徧行因非唯令相
似煩惱增長所以者何若有隨習貪等煩惱皆令瞋
等一切煩惱相續增長堅固由此深重縛故障解脫
得是故建立徧行因。

徧行因言障礙者非唯徧行煩惱但障聖道為此
攝故。

徧行因中彼師立苦集下各十煩惱為體增益五

門感故。此論云由貪等嗔等增故。今言四諦下皆是有一煩惱通迷四諦見四諦斷能為因故。如迷諦相修道不能不通迷故。無力不能增長諸惑若徧緣行在五門名徧行因即增上緣唯現行望現行故。此同小乘。今大乘若貪與貪為徧行因何等亦是所增煩惱通因緣增上緣攝自類他類二各別故。若種子與現徧行法為因。即唯因緣。

攝受者謂不善及善有漏法能攝受自體故即是異熟因。由此能引攝當來一向不相似無覆無記自體所攝異熟果故。即攝受義建立異熟因。善有漏言為

簡無漏。由違生死故不能感異熟果。

異熟因不同餘宗唯據內自體有異熟因也。

異熟因彼以二門。一止諸部。二品數。感果不同。如可信弟子部三善根中除無癡但餘二善無心定體是善報。亦能得三不善根前一唯欲界癡通三界感果亦爾。正量部欲界身起上二界業受二界報。以無漏業得無漏報譬喻師離思無報因離受無報果復有說報熟因亡未熟因在。大眾部唯心心所成報非餘法。薩婆多三業皆報因。一業感一果不得多身等。彼云今大乘四蘊為報因。五蘊為

果然無表既是色蘊。五蘊今為因。品數者。瑜伽五十九。此論第七云。上中下業果。乃至如瑜伽等問答分別。如五十九六十大論第九等分別。今大乘唯增上緣。應問七支三業何者。感總別現俱一思同感一果耶。然顯揚論不破異熟因。不壞因果故。如大乘餘五因皆增上緣攝。今依攝論第二卷相應與異熟徧行。即阿賴耶識。似解是因緣。是異熟因。因緣所攝。今解但許彼因。即第八識。非許異熟因。亦因緣攝。如上所說。亦有因緣義。唯除異熟因。從多分故。認彼也。以異熟因。即本識種子故。

大乘阿毗達磨雜集論述記卷第十四

